

# Bersilat, bertarung dengan semangat abang-adik

Berita Harian | Isnin, 25 Februari 2018

►ZULAIQAH ABDUL RAHIM  
zulabr@sph.com.sg

MEMBESAR dengan sikap suka bersaing antara satu sama lain.

Lantas tidak mengejutkan wujudnya persaingan antara pasangan adik-beradik srikandi silat negara ini.

Namun begitu, Nurul Shafiqah Mohd Saiful, 25 tahun, dan Nurul Suhaila Mohd Saiful, 24 tahun, sama-sama kuat sepanjang penglibatan mereka dalam arena sukan silat.

“Kami akan bertengkar membandingkan siapa yang mempunyai tendangan atau tumbukan yang paling kuat dalam gelanggang.

“Tapi, pada masa yang sama, kami juga menyokong dan beri motivasi kepada satu sama lain agar dapat terbitkan yang terbaik dalam prestasi masing-masing,” kata Nurul Shafiqah, kakak pasangan adik-beradik itu.

Tahun lalu, kededua beradik itu sama-sama mengharumkan nama negara di kejohanan silat antarabangsa.

Nurul Shafiqah, atlet negara sepenuh masa dan juga mahasiswa di Universiti Teknologi Nanyang, membawa pulang pingat gangsa dalam acara tanding puteri kelas B (50-55 kilogram) di Sukan Asia Jakarta-Palembang 2018.

Adiknya, Nurul Suhaila, pula menjuarai acara kelas D (60-65 kilogram) di Kejohanan Pencak Silat Sedunia ke-18 yang diadakan di Singapura.

“Kami sentiasa berbangga dengan pencapaian masing-masing walaupun dalam satu pertandingan yang kami sama-sama sertai, satu di antara kami mencapai keputusan yang lebih baik.

Kami ingin melihat satu sama lain berjaya,” ujar Nurul Suhailah, atlet negara sepenuh masa.

Bagi pasangan adik-beradik pendekar silat, Sheik Ferdous Sheik Alau'ddin, 22, tahun, dan Sheik Farhan Sheik Alau'ddin, 21 tahun, persaingan di antara mereka tidak wujud.

Sheikh Ferdous, juara acara Kelas I (85-90 kilogram) di Kejohanan Pencak Silat Sedunia ke-18, berkata:

“Tiada persaingan antara adik-beradik. Hanya ada sokongan dan inginkan peningkatan antara satu sama lain.”

Dibesarkan dalam keluarga yang cenderung pada sukan silat, anak-anak Ketua Pegawai Eksekutif Persekutuan Silat Singapura (Persisi), Sheik Alau'ddin Yacoob Marican, bertuah dapat bergantung kepada satu sama lain menempuh pahit manis menjadi seorang atlet negara.

“Ia sangat membantu mempunyai adik saya dalam sukan yang sama sebab dia juga tahu kepayahan yang saya lalui dalam sukan ini,” tambah Sheikh Ferdous yang menyifatkan Sheikh Farhan sebagai tiang kekuatannya.

Di kejohanan yang sama, Sheikh Farhan menjuarai acara Kelas J (90-95kilogram).

Kedua abang dan adik itu adalah atlet negara sepenuh masa.

Pada 13 Februari, pencapaian keempat-empat pesilat negara itu diiktiraf Sekolah Sukan Singapura (SSP) di satu majlis sambutan ulang tahun ke-15 dan malam anugerah sekolah itu.

Mereka antara 17 alumni SSP yang menerima Anugerah Pencapaian Kecemerlangan Sukan (Alumni).

Sewaktu ditemui di Sekolah Sukan, Sheikh Farhan meluahkan rasa berysyukur bahawa pesilat negara turut dihargai.

“Ini menunjukkan sukan silat mempunyai potensi untuk pergi lebih jauh dan mengharumkan nama Singapura di peringkat antarabangsa.

Saya harap lebih banyak yang akan dilaburkan untuk sukan ini,” kata juara dunia tiga kali berturut-turut itu.

Nurul Suhaila pula menambah: “Saya harap sukan ini akan diluaskan lagi di Sekolah Sukan sebab kami telah membuktikan atlet silat dari sekolah ini boleh mencapai kejayaan di peringkat antarabangsa.”



**BERSAING SIHAT:** Persaingan sihat antara Suhaila (kanan) dan Shafiqah (kiri) menjadi motivasi untuk capai kejayaan dalam acara masing-masing. — Foto-foto BH oleh LIM YAOHUI



**BERTUAH CEBURI SUKAN SAMA:** Sheik Farhan (kanan) dan Sheik Ferdous (kiri) menjadi tiang kekuatan satu sama lain untuk mencapai kejayaan dalam sukan silat.

“Kami sentiasa berbangga dengan pencapaian masing-masing walaupun dalam satu pertandingan yang kami sama-sama sertai, satu di antara kami mencapai keputusan yang lebih baik. Kami ingin melihat satu sama lain berjaya.”

— Nurul Suhailah.

“Tiada persaingan antara adik-beradik. Hanya ada sokongan dan inginkan peningkatan antara satu sama lain.

...Ia sangat membantu untuk mempunyai adik saya dalam sukan yang sama sebab dia juga tahu kepayahan yang saya lalui dalam sukan ini.”

— Sheikh Ferdous.